



EUROPEAN COURT OF HUMAN RIGHTS
COUR EUROPÉENNE DES DROITS DE L'HOMME

ადამიანის უფლებათა ევროპული სასამართლო

მეორე სექცია

საქმე “ზაინდრავა და ძამაშვილი საქართველოს წინააღმდეგ”

(საჩივარი № 18183/05)

გადაწყვეტილება
სტრასბურგი

2010 წლის 8 ივნისი

საბოლოო ვახდა
08/09/2010

წინამდებარე გადაწყვეტილება შესაძლოა დაექვემდებაროს რედაქციულ გადასინჯვას

საქმეში: ხაინდრავა და ძამაშვილი საქართველოს წინააღმდეგ,
ადამიანის უფლებათა ევროპული სასამართლოს (მეორე სექცია) პალატამ,
შემდეგი შემადგენლობით:
*ფრანსუაზ ტულკენსი, თავმჯდომარე,
დანუტე იოჩიენე,
დრაგოლიუბ პოპოვიჩი,
ანდრაშ შაიო
ნონა წოწორია,
კრისტინა პარდალოსი,
გვიდო რაიმონდი, მოსამართლეები
და სალი დოლე, სექციის განმწესრიგებელი,*
განხილა რა საქმე პალატის 2010წ. 18 მაისის სხდომაზე, გამოიტანა შემდეგი
გადაწყვეტილება:

1. პროცედურა

1. საქმეს საფუძვლად დაედო საჩივარი (n° 18183/05), რომელიც სასამართლოში წარდგენილ იქნა საქართველოს ორი მოქალაქის, ბ-ნ გივი ხაინდრავასა („მომჩივანი“) და ქ-ნ მარი ძამაშვილის („მომჩივანი ქალბატონი“) მიერ, 2005წ. 7 აპრილს, ადამიანის უფლებათა და ძირითად თავისუფლებათა დაცვის ევროპული კონვენციის („კონვენცია“) 34-ე მუხლის საფუძველზე.

2. სასამართლოს წინაშე განმცხადებლებს წარმოადგენენ ბ-ნი ზაზა ხატიაშვილი და ქ-ნი ცირა ჯავახიშვილი, ადვოკატები, რომლებიც საადვოკატო საქმიანობას თბილისში ახორციელებენ. საქართველოს მთავრობას („მთავრობა“) წარმოადგენდა ბ-ნი ბესარიონ ბოხაშვილი - ყოფილი სახელმწიფო წარმომადგენელი.

3. მომჩივანი განსაკუთრებით ასაჩივრებდა იმ ფაქტს, რომ კომპეტენტურმა ორგანოებმა უგულვებელყვეს მისი სიცოცხლის ხელყოფის ფაქტზე გამოძიების ჩატარების არაერთი მოთხოვნა.

4. მომჩივანთა მიერ, კონვენციის მე-2 და მე-13 მუხლების საფუძველზე წამოყენებული პრეტენზიების შესახებ მთავრობას 2006წ. 28 აგვისტოს ეცნობა (რეგლამენტის 54§2 “ბ” მუხლი). იმავე დღეს, სასამართლომ, საჩივრის მისაღებობისა და არსებითი მხარის ერთდროულად განხილვა გადაწყვიტა (კონვენციის 29-ე (§3) მუხლი).

ფაქტები

1. საქმის გარემოებები

5. მომჩივნები დაიბადნენ შესაბამისად, 1938 და 1959 წელს. ისინი ცხოვრობენ თბილისში და მეუღლეები არიან.

6. 1997 წელს, დილის 4 საათზე, პირველ მომჩივანს თავს დაესხნენ საკუთარ სახლში, *მარტვილის* რაიონში (სამეგრელო-ზემო სვანეთის ადმინისტრაციული ერთეული). ის თავის არეში ძლიერ იქნა ნაცემი სამი (ან ორი) პირის მიერ ავტომატის კონდახითა და წიხლებით.

7. მომჩივნის თანახმად, მეორე დღეს, მისი ოჯახის წევრებმა პოლიციაში შეიტანეს საჩივარი, რომელიც უპასუხოდ დარჩა. ამის შემდეგ, მომჩივანმა თვითონ მიაგნო თავდამსხმელთაგან ორს – დ.პ.-სა და გ.ტ.-ს, განაიარაღა ისინი და თავისთან, სახლში მიიყვანა. შემდეგ, ის დაუკავშირდა გ.მ.-ს, მარტვილის რაიონის პროკურორსა და ვ.ბ.-ს - მის თანაშემწეს, რათა მათ დაეკითხათ დაკავებული პირები და ბოლოსდაბოლოს, რეაგირება მოეხდინათ მის საჩივარზე.

8. მომჩივანმა ვიდეოფირზე ჩაიწერა აღნიშნული შეხვედრა, რომელიც მის სახლში, 1998წ. 24 სექტემბერს შედგა. საქმეში არსებული ვიდეოჩანაწერიდან შემდეგი ელემენტები იკვეთება : რაიონის პროკურორისა და მისი თანაშემწისთვის ორი დაკავებული პირის ვინაობის გამხელის შემდეგ, მომჩივანი განმარტავს, რომ საქმე ეხება იმ პირებს, რომლებმაც, 1997 წლის ერთ-ერთ ღამეს, მასზე განახორციელეს თავდასხმა მისი მოკვლის მიზნით. პროკურორისა და მისი თანაშემწის წინაშე, ორივე აღნიშნულმა პირმა დაადასტურა, რომ მომჩივანზე სადავო თავდასხმა მათ ა.გ.-ს – ადგილობრივი პოლიციის ორი მაღალჩინოსნის მამის – ბრძანებით განახორციელეს. მათ განმარტეს, რომ ა.გ.-ს დავალებით, მომჩივანზე განხორციელებული თავდასხმა ისეთი სიმძიმის უნდა ყოფილიყო, რომ ეს უკანასკნელი მომკვდარიყო. თუ აღნიშნული მიზანი მიღწეული იქნებოდა, თავდამსხმელები 50.000 აშშ დოლარს მიიღებდნენ, მაშინ როდესაც არასასიკვდილო დარტყმების მიყენება მათ მხოლოდ 1.500 აშშ დოლარს მოუტანდა. ა.გ.-მ მათ ასევე მისცა „კალაშნიკოვის“ სისტემის ავტომატები. მესამე თავდამსხმელი, ვინმე გ.ჩ-უა, მეტსახელად კო-ია („კო-ია“), სავარაუდოდ, შუამავლის როლს ასრულებდა. ამის შემდეგ, დ.პ. და გ.ტ. ყვებიან კო-იასთან მათი პირველი შეხვედრის შესახებ, რომელიც მიტოვებულ სახლში შედგა და რომლის ადგილმდებარეობაც მათ მიუთითეს. გ.ტ.-ს თანახმად, კო-იას სურდა, რომ მომჩივანი „სასტიკად ყოფილიყო ნაცემი“, რათა „*მისი ასაკიდან გამომდინარე, ის მიყენებული დარტყმებისაგან მომკვდარიყო*“. გადაღებული დიალოგებიდან ირკვევა, რომ დ.პ. და გ.ტ. სხვადასხვა დანაშაულის ჩადენის, მათ შორის, მკვლელობისა და ადამიანის გატაცებისთვის, იმებნებოდნენ და რომ ერთ-ერთი მათგანი მიმალვაში იმყოფებოდა რეგიონის ერთ-ერთი ციხიდან გაქცევის შემდეგ. მომჩივანი მათ, ტყეებში, ოთხი თვის განმავლობაში ეძებდა. ასევე გაირკვა, რომ აღნიშნულმა პირებმა მომჩივნის მეზობელი, 78 წლის ქალბატონი მოკლეს. აღნიშნული მკვლელობის

მიზეზები მომჩივანმა თავად გამოიკვლია. გარდა ამისა, საუბრებიდან ირკვევა, რომ ხსენებულ ადამიანის გატაცების საქმეებში, დ.პ. და გ.ტ. ადგილობრივი პოლიციის ერთ-ერთ თანამშრომელთან კავშირში მოქმედებდნენ.

9. აღნიშნულ შეხვედრას მომჩივნის სამი თუ ოთხი მეზობელი დაესწრო. მათ სიგარეტი და სასმელი წყალი მისცეს დ.პ.-სა და გ.ტ.-ს, რომლებიც გრძელ სკამზე, გვერდიგვერდ ისხდნენ და თავისუფლად შეემლოთ მოძრაობა და ჟესტიკულაცია. მეზობლების თანდასწრებით, მომჩივანი ამტკიცებდა, რომ მან მხოლოდ დ.პ.-ს და ისიც მხოლოდ ერთხელ, დასაწყისში სცემა და რომ მან დაინდო გ.ტ., რომელიც მასზე სადავო თავდასხმის დროს, შედარებით ჰუმანურად იქცეოდა. ამის შემდეგ, მომჩივანი მათ იცავდა და ვერავინ გახედავდა აღნიშნული ორი პირის დამცირებას, ვიდრე ისინი მომჩივნის სახლში ცხოვრობდნენ და მის საკვებს ინაწილებდნენ.

10. დასასრულს, მომჩივანი პროკურორებს ეუბნება, რომ მისი მიზანი, პირისპირ შეხვედრებინა ისინი ბოროტმოქმედებთან, მიღწეულია და რომ ახლა, უკვე მათ უნდა მოეხდინათ შემდგომი რეაგირება. პროკურორებს რეაგირება არ მოუხდენიათ. ამის შემდეგ, მომჩივანი ოთახიდან გავიდა და „კალაშნიკოვის“ სისტემის ორი ავტომატით დაბრუნდა, რომლებიც მან დ.პ.-სა და გ.ტ.-ს დაუბრუნა და გააფრთხილა, რომ თუკი ისინი აღნიშნულ იარაღს ერთხელ კიდევ გამოიყენებდნენ, ინანებდნენ, მომჩივანმა მათ ასევე დაუბრუნა მჭიდები, რომლებიც ვაზნებისგან დაცალა. მომჩივანმა თქვა, რომ „თუ პროკურორები მათ არ დააკავებდნენ, მაშინ, პირადად მას, დამნაშავეთა შემდგომი დაკავების არავითარი მიზეზი აღარ ჰქონდა“. შემდეგ, მომჩივანმა პროკურორები გააფრთხილა, რომ პროკურატურის მხრიდან რეაგირებას კიდევ ერთი კვირის განმავლობაში დაელოდებოდა. კერძოდ, მომჩივანმა მოითხოვა, რომ ა.გ. მასთან მისულიყო და უარეყო ის სიცრუე, რაც მის პატიოსნებას ზიანს აყენებდა (იხ. §12 ქვემოთ), წინააღმდეგ შემთხვევაში, ის იძულებული გახდებოდა, თავად გაესწორებინა ანგარიში. ამის შემდეგ, მომჩივანი დაემუქრა ა.გ.-სა და მისი გვარის მატარებელ ყველა პირს. აღნიშნულზე ერთ-ერთ პროკურორს მყისიერი რეაქცია ჰქონდა. მომჩივანმა ის დაამშვიდა და უთხრა, რომ მას არ გულისხმობდა. მომჩივანმა პროკურორები გააფრთხილა, რომ თუკი ის იძულებული გახდებოდა, პირადად ეძია შური და შემდეგ ტყეში გახიზნულიყო, ამაზე პროკურორები იქნებოდნენ პასუხისმგებელნი და მათ სთხოვა, „ეს არ დაეშვათ“. მომჩივანმა იკითხა, როგორ შეიძლებოდა, რომ ის საქმის კურსში იყო ადგილობრივი სამართალდამცავი ორგანოების მიერ ხელდაფარებული დანაშაულის შესახებ, მაშინ როდესაც პროკურორებმა ამაზე არაფერი იცოდნენ. ამაზე ერთ-ერთმა პროკურორმა უპასუხა, რომ ამისთვის საჭირო იყო დაზარალებულის მიერ საჩივრის შეტანა. მომჩივანმა მას ურჩია, რომ იმის მაგივრად, რომ დალოდებოდა დაზარალებულის მისვლას შესაბამის ორგანოებში, ზოგჯერ თვითონაც მისულიყო დაზარალებულთან. თუმცა, მომჩივნის თქმით, ყოველივე ეს „ხელისუფლებას არ აინტერესებდა“. ერთ-ერთმა პროკურორმა მას უპასუხა, რომ ეს „ერთ დღეს მაინც შეიცვლებოდა“. ამის გამო მომჩივანი აღშფოთდა და ჰკითხა მათ თუ რა შეიძლებოდა მას მოსვლოდა იმის მოლოდინში სანამ „რამე შეიცვლებოდა“ და ვინ დაიცავდა მას, თუკი ხვალ კიდევ

ვინმე მივიდოდა მის მოსაკლავად. რაიონის პროკურორმა დამნაშავეებს შესთავაზა დანებება და მიმალვაში ყოფნის შეწყვეტა. სანაცვლოდ, ის მათ „*ჰუმანური ჟესტის*“ გაკეთებასა და გამოსწორებაში დახმარებას დაპირდა. ბოროტმოქმედებმა დანებებაზე უარი განაცხადეს. ამის შემდეგ ისინი გაათავისუფლეს.

11. იმის გამო, რომ აღნიშნული შეხვედრის მიუხედავად, პროკურატურას რეაგირება არ მოუხდენია, მომჩივანი პირდაპირ ა.გ.-სთან მივიდა, რათა გაერკვია მიზეზები, რომლებმაც ის აიძულეს, მისი მკვლელობა შეეკვეთა. აღნიშნული საუბრის შინაარსი უცნობია, თუმცა, საქმიდან ირკვევა, რომ ამ ორ პიროვნებას დიდი ხნის მტრობა ჰქონდათ. მომჩივნის თანახმად, სწორედ აღნიშნული რევანშის მცდელობებისთვის ბოლოს მოსაღებად და მათი მამის დასაცავად დააკავეს ის ა.გ.-ს ვაჟებმა, პოლიციელებმა, 2000 წელს (იხ. შემდგომ).

12. 2000წ. 12 იანვარს, მომჩივანი დაკავებულ და ექვმიტანილად ცნობილ იქნა ფულის გამოძალვაში, იარაღის უკანონო ტარებაში, შენახვასა და გადატანაში, აგრეთვე. სხვისი თავისუფლების ხელყოფაში. საქმიდან ირკვევა, რომ 1994 წლის დეკემბერში, ა.გ.-ს ვაჟი, ადგილობრივი პოლიციის ერთ-ერთი მაღალჩინოსანი, ბოროტმოქმედთა ჯგუფმა გაიტაცა. მომჩივანმა ა.გ.-ს შეუთვალა, რომ მას გამტაცებლებთან კონტაქტი ჰქონდა და შეეძლო მისი შვილის გაათავისუფლებაში დახმარება თანხის სანაცვლოდ. ა.გ. დათანხმდა გამოსასყიდის თანხის გადაცემაზე მისი ვაჟის გაათავისუფლებიდან ერთი თვის ვადაში. მძევალი გაათავისუფლეს, მაგრამ ა.გ.-მ უარი განაცხადა გამოსასყიდის გადახდაზე. ამის გამო, მომჩივანი დაემუქრა ა.გ.-ს და მოითხოვდა გამოსასყიდის თანხის გადახდას. მიიღო რა უარი, მან ა.გ. და მისი ძმისშვილი დაახლოებით ერთი საათით დააპატიმრა. ა.გ.-მ გაქცევა მოახერხა. ამის შემდეგ, მომჩივანმა მისი ძმისშვილი გაათავისუფლა. გასამართლდა რა ქუთაისის საოლქო სასამართლოს მიერ 2001წ. 12 თებერვალს, მომჩივანს 7 წლით თავისუფლების აღკვეთა შეეფარდა.

13. მომჩივნის წინააღმდეგ აღძრული სისხლისსამართლებრივი დევნის ფარგლებში, 2000წ. 7 აპრილს, *აბაშის* რაიონის პროკურორმა დაკითხა კო-ია, რომელიც სხვა სისხლის სამართლის საქმის გამო იყო დაკავებული. კო-იას მტკიცებით, 1997 წლის ერთ ღამეს, მან, დ.პ.-მ და გ.ტ.-მ იქეიფეს და მთვრალეები იყვნენ. მათ გადაწყვიტეს მომჩივანთან მისვლა „*მის საცემად*“. როდესაც ისინი ადგილზე მივიდნენ, დ.პ.-მ და გ.ტ.-მ მომჩივანი „*უმოწყალოდ*“ სცემეს, მაგრამ პირადად მას ამაში მონაწილეობა არ მიუღია. კო-ია ამტკიცებდა, რომ ა.გ.-ს აღნიშნულ ინციდენტთან არავითარი კავშირი არ ჰქონდა. მისი თქმით, დ.პ.-მ და გ.ტ.-მ იმის გამო დაადანაშაულეს ა.გ., რომ მომჩივანმა ისინი დააკავა და სცემა. კო-ია ამტკიცებდა, რომ მომჩივანმა ისიც დაიჭირა, სცემდა და მისგან მოითხოვდა, ეღიარებინა, რომ მისი მკვლელობა ა.გ.-მ შეუკვეთა. უარი თქვა რა აღიარებაზე, კო-იამ გაქცევა მოახერხა. კო-იამ პროკურორს აცნობა, რომ გ.ტ. გარდაიცვალა, მაგრამ დ.პ.-ს მისამართი ერთმა პიროვნებამ იცოდა, რომლის ვინაობაც მან პროკურორს გაუმხილა.

14. 2001წ. 20 აპრილს, კო-იამ ციხიდან მიმართა უზენაესი სასამართლოს თავმჯდომარეს, გენერალურ პროკურორს, იუსტიციის მინისტრსა და პარლამენტის ადამიანის უფლებათა კომიტეტის თავმჯდომარეს და აცხადებდა, რომ 2000წ. 7

აპრილის დაკითხვის დროს, მას ოჯახის ამოწყვეტით დაემუქრნენ, რამაც იგი აიძულა, მომჩივანი დაედანაშაულებინა. ის ამტკიცებდა, რომ სინამდვილეში, ის, დ.პ.-სა და გ.ტ.-სთან ერთად, მომჩივანზე 1997 წელს მოწობილ თავდასხმაში მონაწილეობდა ა.გ.-ს მიერ შეკვეთილი მკვლელობის განხორციელების მიზნით. მისივე მტკიცებით, ის პირადად აწარმოებდა ა.გ.-სთან მოლაპარაკებებს, დავალების წარმატებით შესრულების შემთხვევაში თანხის მიღებასთან დაკავშირებით. ვინაიდან მომჩივანი გადარჩა, სამმა თავდამსხმელმა, ა.გ.-ს მიერ დაპირებული 50.000 აშშ დოლარის ნაცვლად მხოლოდ 1.500 აშშ დოლარი მიიღო. შემდგომი რამდენიმე კვირის განმავლობაში, სამი ბოროტმოქმედი ამაოდ ცდილობდა ა.გ.-ს მიერ დაპირებული 50.000 აშშ დოლარის მიღების გეგმის განხორციელებას. ერთ დღეს, ისინი მომჩივანმა იპოვა, გათოკა და სახლში მიიყვანა. პირველი ორი დღის განმავლობაში, მომჩივანი მათ სცემდა, მაგრამ შემდეგ კარგად ეპყრობოდა. დ.პ.-სა და გ.ტ.-სგან განსხვავებით, კო-იამ გაქცევა მოახერხა. თავის წერილში, კო-ია მომჩივანს პატიებას სთხოვდა იმისთვის, რომ ასე სულმდაბლად უღალატა და ა.გ.-ს მიეყიდა. ის ამტკიცებდა, რომ აღნიშნული ფაქტების შესახებ ადრე აცნობა შესაბამის ორგანოებს, მაგრამ მისი ჩვენებები გაქრა.

15. 2001წ. 17 მაისის საჩივრით, რომელიც 2001წ. 22 მაისს იქნა შეტანილი, მომჩივანმა ქალბატონმა გენერალურ პროკურორს წარუდგინა წინამდებარე გადაწყვეტილების 6-10 პარაგრაფებში მოყვანილი ფაქტები და სისხლის სამართლის საქმის აღძვრა მოითხოვა. მან გაასაჩივრა ის ფაქტი, რომ ადგილობრივი კომპეტენტური ორგანოები არ ინტერესდებოდნენ აღნიშნული საქმით, მაშინ, როდესაც მათ მყისიერი რეაგირება მოახდინეს მისი მეუღლის დაკავების მიზნით. მომჩივანი ქალბატონი მიიჩნევდა, რომ ადგილობრივი ორგანოების მხრიდან ასეთი შერჩევითი მიდგომა განპირობებული იყო ა.გ.-ს ოჯახის წევრების – პოლიციელების პროფესიული სტატუსით. რაც შეეხება ა.გ.-ს, ის მართავდა თავის ოჯახურ კლანს, რომლის წარმომადგენლებიც რეგიონში მაფიოზებით მოქმედებდნენ. მომჩივანმა ქალბატონმა აღნიშნა, რომ 1998წ. 24 სექტემბრის შეხვედრის ვიდეოჩანაწერი (იხ. §8 ზემოთ) რაიონის პროკურატურაში ინახებოდა. მან მოითხოვა მის მეუღლეზე 1997 წელს განხორციელებული თავდასხმის ფაქტზე გამოძიების ჩატარება და ა.გ.-ს, როგორც დანაშაულის შემკვეთის, სისხლის სამართლის პასუხისგებაში მიცემა.

16. ზემოხსენებულ საჩივარში, მომჩივანმა ქალბატონმა ასევე განმარტა, რომ 1998წ. 24 სექტემბრის შეხვედრიდან რამდენიმე თვის შემდეგ, გ.ტ. საეჭვო ვითარებაში იქნა მოკლული, მაშინ, როდესაც კო-ია ციხეში იყო, ხოლო დ.პ. დიდი ხნის განმავლობაში არ გამოჩენილა.

17. 2001წ. 26 ივნისს, შინაგან საქმეთა სამინისტრომ, *მარტვილის* რაიონულ პროკურატურას („მარტვილის პროკურატურა“) გადასცა 1998წ. 24 სექტემბრის შეხვედრის ვიდეოჩანაწერი, საუბრების ტექსტები და აღნიშნულ საკითხთან დაკავშირებით ჩატარებული შიდასამსახურებრივი გამოძიების შედეგები. 2001წ. 30 ივლისს, *მარტვილის* პროკურატურამ განიხილა აღნიშნული საქმის მასალები და მომჩივანი ქალბატონის საჩივარი არ დააკმაყოფილა. აღნიშნული დადგენილება

გაუქმდა ზემდგომი თანამდებობის პირის სახელზე საჩივრის შეტანის შემდეგ. გამოძიება განახლდა 2002წ. 5 მარტს.

18. 2002წ. 7 მარტს, *მარტვილის* პროკურორის თანამშემწემ მომჩივანი ციხეში მოინახულა რათა იგი დაეკითხა მის წინააღმდეგ ორგანიზებული თავდასხმის თაობაზე. მომჩივანმა ჩვენების მიცემაზე უარი საჩივარა იმ მოტივით, რომ ის *მარტვილის* პროკურატურას საერთოდ არ ენდობოდა და რომ საქმიდან ამ პროკურატურის ჩამოცილება სურდა. მომჩივნის მტკიცებით, ის მზადყოფნას აცხადებდა, სხვა რაიონის პროკურატურის მიერ ყოფილიყო დაკითხული.

19. იმავე 2002წ. 7 მარტს, იგივე პროკურორმა კო-ია მოინახულა ციხეში, რათა იგი მომჩივნის წინააღმდეგ ორგანიზებული თავდასხმის თაობაზე დაეკითხა, მაგრამ კო-იამ ასევე უარი განაცხადა ჩვენების მიცემაზე იმ მოტივით, რომ ის *მარტვილის* პროკურატურას საერთოდ არ ენდობოდა და თუ საქმე გადაეცემოდა სხვა რაიონის ან გენერალურ პროკურატურას, ის მზად იქნებოდა თანამშრომლობისთვის.

20. დაკითხვისას, ა.გ. ამტკიცებდა, რომ მას მომჩივნისთვის ზიანის მიყენების არავითარი ინტერესი არ ჰქონდა და შესაბამისად, ის ვერ იქნებოდა მკვლელობის დამკვეთი.

21. ზემოხსენებული ელემენტების საფუძველზე, 2002წ. 25 მარტს, *მარტვილის* პროკურატურამ მომჩივანს უარი უთხრა სისხლის სამართლის საქმის აღძვრაზე (სსსკ-ის 28-ე მუხლის „ა“ პუნქტი). კერძოდ, აღნიშნა, რომ გ.ტ. გარდაიცვალა, რომ დ.პ., როგორც ეჭვიმტანილი სხვა საქმეებში, იძებნებოდა და რომ მომჩივანი უარს ამბობდა ჩვენების მიცემაზე. პროკურატურის შიდა გამოძიებამ სადავო ვიდეოჩანაწერში არსებულ ფაქტებთან დაკავშირებით (იხ. §23 ზემოთ), ისევე როგორც სისხლისსამართლებრივმა გამოძიებამ, არ გამოავლინა მომჩივანი ქალბატონის მიერ, მისი მეუღლის სახელით შეტანილ საჩივარში ხსენებული, დანაშაულებში ეჭვიმტანილი პირები. გარდა ამისა, ხაზგასმით აღინიშნა, რომ მის წინააღმდეგ განხორციელებული სისხლისსამართლებრივი დევნის ფარგლებში, მომჩივანს არასდროს წამოუწევია 1997 წელს, მისი სიცოცხლის ხელყოფის საკითხი. და ბოლოს აღნიშნულ იქნა, რომ მომჩივანი ქალბატონის „ილუზიების“ საპირისპიროდ, მისი მეუღლე დამნაშავე იყო წაყენებულ ფაქტებთან მიმართებაში და რომ აღნიშნულის გამო მას სისხლისსამართლებრივი მსჯავრი დაედო 2001წ. 12 თებერვალს.

22. სისხლის სამართლის საქმის აღძვრაზე უარის თქმის შესახებ აღნიშნული დადგენილება გენერალურმა პროკურატურამ 2002წ. 3 აპრილს გააუქმა და საქმე *მარტვილის* პროკურატურას ხელახალი განხილვისთვის დაუბრუნა.

23. 2002წ. 7 მაისს, გენერალურმა პროკურატურამ აღნიშნული გადაწყვეტილების შესახებ მომჩივან ქალბატონს აცნობა და ასევე შეატყობინა მას, რომ ჩატარდა შიდა გამოძიება და ბრალდება გ.მ.-ს მიერ დამნაშავეთა მფარველობის შესახებ, რომელიც სხვათა შორის, მას შემდეგ გათავისფლებულ იქნა თანამდებობიდან და აგრეთვე, რეგიონში მისი ხელმძღვანელების მიერ, არ დადასტურდა. გენერალური პროკურატურის აღნიშნული წერილიდან ირკვევა, რომ სისხლის სამართლის საქმის აღძვრაზე უარის თქმის შესახებ 2002წ. 25 მარტის

დადგენილების გადასინჯვა და გაუქმება მომჩივანი ქალბატონის წერილის ერთ-ერთ გაზეთში, 2002წ. 1 აპრილს გამოქვეყნების შედეგს წარმოადგენდა (იხ. §27 ქვემოთ).

24. 2002წ. 27 მაისს, მომჩივანმა ქალბატონმა *მარტვილის* პროკურორს კვლავ მოსთხოვა მისი მეუღლის სიცოცხლის ხელყოფასთან დაკავშირებით ზომების მიღება. მან კმაყოფილება გამოხატა გენერალური პროკურატურის მიერ სისხლის სამართლის საქმის აღძვრაზე უარის თქმის შესახებ 2002 წ. 25 მარტის დადგენილების გაუქმებასთან დაკავშირებით.

25. 2002წ. 27 მაისს, მომჩივნის ადვოკატმა, წარმოადგინა რა იგივე ფაქტები რაც მომჩივანმა ქალბატონმა, *მარტვილის* პროკურატურას მიმართა. დაეყრდნო რა სსსკ-ის შესაბამის დებულებებს, მან მოითხოვა გამოძიების გაგრძელება მისი კლიენტის წინააღმდეგ განხორციელებულ თავდასხმასთან დაკავშირებით და მისი დაზარალებულად ცნობა. მან ასევე მოითხოვა, ა.გ.-ს სისხლის სამართლის პასუხისგებაში მიცემა და მისი კო-იასთან დაპირისპირება.

26. 2002წ. 10 ივნისს, *მარტვილის* პროკურატურამ ადვოკატს ხელახლა უთხრა უარი სისხლის სამართლის საქმის აღძვრაზე (სსსკ-ის 28-ე მუხლის „ა“ პუნქტი) და დადგენილებაში 2002წ. 15 მარტის წინა დადგენილებაში მოყვანილი ფაქტები და მოტივები გაიმეორა. აღნიშნული ახალი დადგენილება არაფერს ამბობდა დამატებითი გამოძიების შესახებ, რომელიც, სავარაუდოდ, ჩატარდა.

27. იმის გამო, რომ შესაბამისი ორგანოებიდან პასუხი არ მიიღო, მომჩივანმა ქალბატონმა საქართველოს პრეზიდენტს ღია წერილით მიმართა, რომელიც გაზეთ „ახალი თაობის“ 2002წ. 1 აპრილის ნომერში გამოქვეყნდა. ის კითხვებს სვამდა იმ მიზეზებთან დაკავშირებით, რომელთა გამოც შესაბამისი ორგანოები მის ოჯახს უარს ეუბნებოდნენ თავდასხმის გამოძიების უფლებაზე, რომლის მსხვერპლიც მისი მეუღლე გახდა; მაშინ როდესაც, ამ უკანასკნელთან მიმართებაში, მათ გამოიჩინეს გულმოდგინება მისი დაკავებისა და სასამართლოში წარდგენის მიზნით. მიუთითა რა იმ პროკურორთა გვარები, რომლებსაც მან და მისმა მეუღლემ, სხვადასხვა დროს, ამაოდ მიმართეს, მომჩივანმა ქალბატონმა მოითხოვა, რომ მის საჩივარს, ბოლოსდაბოლოს, ადეკვატური რეაგირება მოჰყოლოდა.

28. აღნიშნული წერილის გამოქვეყნების შემდეგ, მხარეთა მიერ დაუზუსტებელ დღეს, გ.მ. და ვ.ბ., *მარტვილის* ყოფილი პროკურორი და მისი იმდროინდელი თანაშემწე, დაიკითხნენ. დაკითხვის ოქმებიდან ირკვევა, რომ ორივე პროკურორმა დაადასტურა მომჩივნის სახლში, 1998წ. 24 სექტემბრის შეხვედრის დეტალები, როგორც ეს ზემოთ, 8-10 პარაგრაფებშია მოცემული. ისინი ამტკიცებდნენ, რომ სამსახურში დაბრუნებისთანავე, გ.მ.-მ სიტყვიერი შეტყობინება გადასცა ოლქის პროკურორსა და პოლიციის კომპეტენტურ სამსახურებს. პროკურორთა დაკითხვის დანარჩენი ნაწილი უცნობია.

29. 2004წ. 10 მარტს, მომჩივანმა მიმართა გენერალურ პროკურორს და მოითხოვა სისხლის სამართლის საქმის აღძვრა მისი სიცოცხლის ხელყოფის ფაქტისთვის ნათელის მოფენის მიზნით. მან ასევე მოითხოვა პროკურატურის იმ თანამშრომელთა სისხლის სამართლის პასუხისგებაში მიცემა, რომლებსაც, 1997 წლიდან მოყოლებული, არავითარი შემდგომი მსვლელობა არ მიუციათ მისი

სხვადასხვა საჩივრისათვის. მომჩივანი აქცენტს აკეთებდა ორი პროკურორის დაკითხვის ოქმებისა და კო-იას 2001წ. 2 აპრილის წერილის შინაარსზე (იხ. §§ 14 და 28 ზემოთ) და აზუსტებდა, რომ აღნიშნული დოკუმენტები *მარტვილის* პროკურატურაში ინახებოდა. აღნიშნული საჩივრიდან ასევე ირკვევა, რომ მომჩივანმა სისხლის სამართლის საქმის აღძვრაზე უარის თქმის შესახებ 2002წ. 25 მარტის დადგენილების გაუქმებისა და საქმის *მარტვილის* პროკურატურისთვის დამატებითი გამოძიების ჩატარების მიზნით გადაცემის თაობაზე, პირველად, გენერალური პროკურატურის 2002წ. 7 მაისის წერილიდან შეიტყო (იხ. §23 ზემოთ). მაგრამ, ინფორმაციის შემდგომი არაერთგზის მოთხოვნის მიუხედავად, მას *მარტვილის* პროკურატურიდან, პროცედურის შემდგომი მიმდინარეობის შესახებ არავითარი პასუხი არ მიუღია. აღნიშნული მიზეზის გამო, მომჩივანმა მოითხოვა, რომ გენერალურ პროკურატურას საქმე ჩამოერთმია *მარტვილის* პროკურატურისთვის და თვითონ ეწარმოებინა გამოძიება მისი სიცოცხლის ხელყოფის საქმეზე. და ბოლოს, მომჩივანი ამტკიცებდა, რომ ახალი ხელისუფლების პოლიტიკა (რომელიც „ვარდების რევოლუციის“ შემდგომ მოვიდა ქვეყნის სათავეში), რომელიც ითვალისწინებდა ყოფილი მოხელეების დასჯას, რომლებიც წინა ხელისუფლების დროს დაუსჯელნი იყვნენ, მას იმედს უსახავდა, რომ მისი საქმის გამოძიების ბედთან დაკავშირებით.

30. 2004წ. 25 მარტს, გენერალურმა პროკურატურამ აღნიშნული განცხადება *სამეგრელო-ზემო სვანეთის* საოლქო პროკურატურას გადაუგზავნა მოთხოვნასთან ერთად, რომ გადამოწმებულიყო, აღიდრა თუ არა სისხლის სამართლის საქმე მომჩივანის სიცოცხლის ხელყოფის ფაქტზე, მიღებულ იქნა თუ არა რაიმე გადაწყვეტილება აღნიშნულთან დაკავშირებით და შეესაბამებოდა თუ არა ის კანონს. გატარებული ღონისძიებების შედეგები უნდა გადაგზავნილიყო გენერალურ პროკურატურაში. საოლქო პროკურატურას აღნიშნულზე რეაგირება არ მოუხდენია.

31. 2004წ. 30 სექტემბერს, მომჩივანმა, 2004 წლის ივნისში დანიშნული გენერალური პროკურორის წინაშე გაასაჩივრა ზემოაღნიშნული რეაგირების არარსებობა და გააპროტესტა მისი 2004წ. 10 მარტის საჩივრის გადაგზავნა საოლქო პროკურატურისთვის. მან ხელახლა წამოაყენა გამოძიების ჩატარების მოთხოვნა, ამყარებდა რა იმედს ახალი გენერალური პროკურორის დანიშვნაზე. თავის საჩივარში, მომჩივანი გამოხატავდა დიდ იმედგაცრუებას რიგითი მოქალაქეების ბედთან დაკავშირებით, რომლებიც იმედოვნებდნენ, რომ ძველი რეჟიმის დამხობის შემდეგ, ისინი სამართალს იპოვნიდნენ. მან შეახსენა, რომ „ვარდების რევოლუციის“ დანაპირები იყო კანონის უზენაესობა. მომჩივანის თქმით, ეს იყო მისი უკანასკნელი მცდელობა *სტრასბურგის* სასამართლოსთვის მიმართვამდე.

II. შესაბამისი ეროვნული კანონმდებლობა

30. იმ დროისათვის მოქმედი სისხლის სამართლის საპროცესო კოდექსი

მუხლი 24 § 1, 2 და 4, 2005 წ. 25 მარტამდე არსებული რედაქციით

„1. საჯარო სისხლისსამართლებრივი დევნა ხორციელდება ყველა კატეგორიის დანაშაულის საქმეებზე.

2. საჯარო სისხლისსამართლებრივ დევნას ახორციელებენ პროკურორი და გამომძიებელი ფიზიკურ და იურიდიულ პირთა განცხადებების, სახელმწიფო ორგანოთა და არასახელმწიფო ორგანიზაციათა შეტყობინებების, აგრეთვე მასობრივი ინფორმაციის საშუალებათა ცნობების საფუძველზე.

4. მომკვლევია, გამომძიებელი და პროკურორი ვალდებული არიან დანაშაულის ნიშნების აღმოჩენის ყველა შემთხვევაში თავიანთი კომპეტენციის ფარგლებში აღძრან საჯარო ბრალდების საქმე, მიიღონ ზომები დანაშაულის გასახსნელად და დამნაშავის დასადგენად, არ დაუშვან უდანაშაულო პირის სისხლის სამართლის პასუხისგებაში მიცემა.“

მუხლი 24 § 1, და 4, 2005 წ. 25 მარტის ცვლილებების შესაბამისად

„1. საქართველოს სისხლის სამართლის კოდექსის 120-ე (ჯანმრთელობის განზრახ მსუბუქი დაზიანება), 125-ე (ცემა) და 148-ე (ცილისწამება) გათვალისწინებულ დანაშაულთა შესახებ საქმეები აღძვრება მხოლოდ დაზარალებულის საჩივრით (...).“

მუხლი 235 § 1

„1. საჯარო სისხლისსამართლებრივი დევნა ხორციელდება ყველა კატეგორიის დანაშაულის საქმეებზე.

2. საჯარო სისხლისსამართლებრივ დევნას ახორციელებენ პროკურორი და გამომძიებელი. (მე-4 პარაგრაფი გაუქმდა).“

მუხლი 29 §1 დ), რომელიც 2005 წ. 25 მარტს გაუქმდა

„სისხლის სამართალწარმოება ჩერდება თუ: ბრალდებულად სისხლის სამართლის პასუხისგებაში მისაცემი პირი დაუდგენელია - ამ პირის აღმოჩენამდე ან ამ დანაშაულისათვის სისხლისსამართლებრივი დევნის ხანდაზმულობის ვადის გასვლამდე, მაგრამ არა უადრეს 6 თვისა სისხლის სამართლის საქმის აღძვრიდან.“

მუხლი 113 § 2 ა)

„მტკიცებულებათა წარმოდგენის გარეშე არსებულად ითვლება პრეიუდიციები, რომლებიდანაც გამომდინარეობს, რომ სხვა სისხლის სამართლის საქმეზე კანონიერ ძალაში შესული სასამართლო განაჩენით დადგენილი ფაქტობრივი გარემოებები და მათი სამართლებრივი შეფასება სავალდებულოა სასამართლოს, პროკურატურის, გამომძიებლისა და მოსამართლისათვის, თუ პროცესის არც ერთი მონაწილე საეჭვოდ არ ხდის ამ განაჩენის კანონიერებას.“

მუხლი 235 § 1 და 2

„1. საჩივარი შეაქვთ სისხლის სამართლის საქმის წარმოებისათვის პასუხისმგებელ სახელმწიფო ორგანოში ან იმ თანამდებობის პირთან, რომელიც კანონით უფლებამოსილია განიხილოს შესაბამისი საჩივარი და მიიღოს გადაწყვეტილება. (...)

2. (...) საჩივარი პროკურორის მოქმედების ან გადაწყვეტილების გამო უნდა გადაეცეს ზემდგომ პროკურორს (...).“

მუხლი 242 §1, 2005 წ. 25 მარტამდე არსებული რედაქციით

„1. ამ კოდექსით დადგენილი წესით სასამართლოში შეიძლება გასაჩივრდეს გამომძიებლის ან პროკურორის მოქმედება და გადაწყვეტილება, რომლებიც, მომჩივნის აზრით, უკანონო და დაუსაბუთებელია, კერძოდ:

ა) დადგენილება სისხლის სამართლის საქმის აღძვრაზე უარის შესახებ (კოდექსის 269-ე მუხლი) ;

ბ) სისხლისსამართლებრივი დევნის შეწყვეტის შესახებ დადგენილება.“

მუხლი 242 §1, 2005 წ. 25 მარტს შეტანილი ცვლილებების შესაბამისად

„1. ამ კოდექსით დადგენილი წესით სასამართლოში შეიძლება გასაჩივრდეს გამომძიებლის ან პროკურორის მოქმედება და გადაწყვეტილება, რომლებიც, მომჩივნის აზრით, უკანონო და დაუსაბუთებელია, კერძოდ:

ა) სისხლისსამართლებრივი დევნის ან/და წინასწარი გამოძიების შეწყვეტის შესახებ დადგენილება;

ბ) ექსპერტიზის დანიშვნაზე უარის თქმის შესახებ გამომძიებლის ან პროკურორის დადგენილება (...).“

მუხლი 261 §1, 2005 წ. 25 მარტამდე არსებული რედაქციით

„1. დანაშაულის ნიშნების არსებობის ყველა შემთხვევაში მომკვლევნი, მოკვლევის ორგანო, გამომძიებელი, პროკურორი, თავიანთი კომპეტენციის ფარგლებში, ვალდებული არიან აღძრან სისხლის სამართლის საქმე.“

მუხლი 261 §1, 2005 წ. 25 მარტის ცვლილებების შესაბამისად

„დანაშაულის ჩადენის შესახებ ინფორმაციის მიღების შემთხვევაში გამომძიებელი, პროკურორი, თავიანთი კომპეტენციის ფარგლებში, ვალდებული არიან დაიწყონ წინასწარი გამოძიება (...).“

მუხლი 263 § 1

„1. წინასწარი გამოძიების დაწყების საბაზია ცნობები დანაშაულის ჩადენის შესახებ, რომლებიც მომკვლევს, მოკვლევის ორგანოს, გამომძიებელს ან პროკურორს მიაწოდეს ფიზიკურმა ან იურიდიულმა პირებმა (...) ანდა ისინი მოძიებულია მასობრივი ინფორმაციის საშუალებებში, აგრეთვე უშუალოდ სამართალწარმოების ორგანოს მიერ საქმის გამოძიებისას აღმოჩენილი ცნობები (...).“

მუხლი 265 § 1 და 4

„1. ცნობები დანაშაულის ჩადენის შესახებ შეიძლება იყოს წერილობითი ან ზეპირი.“

4. (შეტანილ იქნა ცვლილებები 2005 წ. 25 მარტს) ცნობები დანაშაულის ჩადენის შესახებ დაუყოვნებლივ განიხილება. თუ პირი დაკავებულია, მის მიერ დანაშაულის ჩადენის შესახებ ცნობების შემოწმება და სისხლის სამართლის საქმის აღძვრა ხდება დაკავებიდან 12 საათის განმავლობაში. დანარჩენ შემთხვევებში, სისხლის სამართლის საქმის აღძვრას შეიძლება წინ უძღოდეს მიღებული ცნობების შემოწმება, რაც 20 დღეზე მეტ ხანს არ შეიძლება გაგრძელდეს.“

მუხლი 268 §2, გაუქმდა 2005 წ. 25 მარტს

„სისხლის სამართლის საქმის აღძვრაზე უარის თქმის შესახებ დადგენილების ასლი დაუყოვნებლივ ეგზავნება პროკურორსა და დანაშაულის შემტყობინებელ პირს.“

მუხლი 269, გაუქმდა 2005 წ. 25 მარტს

„დადგენილება სისხლის სამართლის საქმის აღძვრაზე უარის თქმის შესახებ შეიძლება გასაჩივრდეს ზემდგომთან ან სასამართლოში მისი გამოტანის შესახებ შეტყობინების მიღებიდან 15 დღის ვადაში.“

სამართალი

1. კონვენციის მე-2 მუხლის სავარაუდო დარღვევა

33. თავის 2005წ. 7 აპრილის საჩივარში, მომჩივანი ჩივის, რომ მას მრავალრიცხოვან საჩივრებზე არავითარი პასუხი არ მიუღია და ამტკიცებს, რომ მისი სიცოცხლის ხელყოფის ფაქტზე ეფექტიანი გამოძიების არარსებობა წარმოადგენდა კონვენციის მე-2 (§1) მუხლის დარღვევას, რომელიც შემდეგნაირად იკითხება:

„ყოველი ადამიანის სიცოცხლის უფლება კანონით არის დაცული. არ შეიძლება სიცოცხლის განზრახ ხელყოფა, თუ არა სიკვდილის სასჯელის აღსრულების შედეგად, რომელიც სასამართლოს განაჩენით შეეფარდა მოცემულ პირს ისეთი დანაშაულის ჩადენისათვის, რომლისთვისაც კანონი ითვალისწინებს ამ სასჯელს.“

ა. მისაღებობა

1. კონვენციის მე-2 მუხლის გამოყენებადობასთან დაკავშირებით

34. უპირველეს ყოვლისა, სასამართლო აღნიშნავს, რომ წინამდებარე საქმეში კონვენციის მე-2 მუხლის გამოყენებადობა მხარეთა შორის დისკუსიის საგანი არ გამხდარა. თავის მხრივ, სასამართლო აღნიშნავს, რომ მომჩივანი გადაურჩა დ.პ.-სა და გ.ტ.-ს – ორი კერძო პირის, რომლებიც სავარაუდოდ ა.გ.-ს – პოლიციის ორი მაღალჩინოსნის მამის ინსტრუქციებით მოქმედებდნენ - თავდასხმას. 1998წ. 24

სექტემბრის შეხვედრის ვიდეოჩანაწერიდან, სხვადასხვა მონაწილეთა საუბრებიდან და პროკურორების, გ.მ.-სა და ვ.ბ.-ს (იხ. §§ 8, 14 და 28 ზემოთ) შემდგომი ჩვენებებიდან ირკვევა, რომ დ.პ. და გ.ტ. მიზნად ისახავდნენ მომჩივანზე სასიკვდილო თავდასხმის განხორციელებას და რომ ამასთანავე, ისინი „კალაშნიკოვის“ ავტომატებით იყვნენ შეიარაღებულნი. მომჩივანი ნაცემი იქნა თავის არეში კონდახებითა და წიხლებით (იხ. §6 ზემოთ). კო-ია-ს თანახმად, რომელიც სადავო თავდასხმას ესწრებოდა, დ.პ.-მ და გ.ტ.-მ მომჩივანი „უმოწყალოდ“ სცემეს და იმედგაცრუებულნი დარჩნენ, გაიგეს რა, რომ მსხვერპლი გადაარჩა (იხ. §§ 13 და 14 ზემოთ). გარდა ამისა, ის ფაქტი, რომ დ.პ., გ.ტ., და კო-ია მომჩივანთან მივიდნენ და რომ ეს უკანესკნელი ნაცემი იქნა, როგორც ეს აღწერილია, არასდროს გამხდარა მხარეთა შორის დავის საგანი.

35. წინამდებარე საქმის გარემოებებისა და მის ხელთ არსებული მტკიცებულებების გათვალისწინებით, სასამართლო მიიჩნევს, რომ დ.პ.-მ და გ.ტ.-მ მომჩივნის მიმართ განახორციელეს მოპყრობა, რომელმაც, განხორციელებული ძალადობის ხასიათისა და სიმძიმის გათვალისწინებით, მისი სიცოცხლე საფრთხეში ჩააგდო, მიუხედავად იმისა, რომ საბოლოო ჯამში, მომჩივანი გადაარჩა. შესაბამისად, მოცემულ შემთხვევაში, არსებობს კონვენციის მე-2 მუხლის გამოყენების საფუძველი (იხ. სხვათა შორის, *Makaratzis c. Grèce* [GC], n° 50385/99, §§ 49-55, 20 décembre 2004).

2. რაც შეეხება სასამართლოს *ratione temporis* კომპეტენციას

36. მთავრობას მიაჩნია, რომ საჩივრის აღნიშნული ნაწილი დაუშვებელია, ვინაიდან *ratione temporis* თვალსაზრისით, შეუსაბამოა კონვენციის დებულებებთან. ამ თვალსაზრისით, სასამართლო ეყრდნობა საქმეში „*მოლდოვანი და სხვები*“ ჩამოყალიბებულ მოსაზრებას (*Moldovan et autres, et Rostas et autres c. Roumanie* (déc.), n° 41138/98 et 64320/01, 13 mars 2001) რომლის თანახმად, სასამართლო *ratione temporis* კომპეტენტურია გამოძიების ჩატარების ვალდებულებასთან დაკავშირებული საკითხების კუთხით, როდესაც ფაქტები, რომლებიდანაც აღნიშნული ვალდებულება გამომდინარეობს, მოცემულ სახელმწიფოსთან მიმართებაში, კონვენციის ძალაში შესვლამდე მოხდა.

37. მომჩივანი ეწინააღმდეგება აღნიშნულ მოსაზრებას.

38. სასამართლო აღნიშნავს, რომ საქართველოსთან მიმართებაში, კონვენცია ძალაში შევიდა 1999წ. 20 მაისს. შესაბამისად, თუკი ფაქტებს ადილი ჰქონდა 1997 წელს, ანუ აღნიშნულ თარიღამდე, ხელისუფლების ორგანოების მიერ გამოძიება აღნიშნული თარიღის შემდეგ ჩატარდა. გარდა ამისა, 2001 და 2004 წლებს შორის პერიოდში, მომჩივანი რეგულარულად მიმართავდა კომპეტენტურ ორგანოებსა და მათ სხვადასხვა წარმომადგენლებს საქმის ეფექტიანი გამოძიების მოთხოვნით (§15 და შემდგომი პარაგრაფები ზემოთ).

39. სასამართლო შეახსენებს, რომ ახლახანს, დიდმა პალატამ განიხილა სასამართლოს სხვადასხვა პალატების მიერ, მსგავს საქმეებში, მათ შორის საქმეში

„მოლდოვანი და სხვები” – რომელზეც მთავრობა მიუთითებს - ჩამოყალიბებული პოზიცია აღნიშნულ სფეროში მიდგომებს შორის განსხვავების დასადგენად (*Šilih c. Sloveńie* [GC], n° 71463/01, §§ 148-151, 9 avril 2009). აღნიშნული სიტუაციის გამოსწორების მიზნით, დიდმა პალატამ დაადგინა, რომ კონვენციის მე-2 მუხლის მიზნებისთვის, ეფექტიანი გამოძიების ჩატარების პროცედურული ვალდებულება ცალკე არსებულ, დამოუკიდებელ ვალდებულებას წარმოადგენს. მიუხედავად იმისა, რომ აღნიშნული ვალდებულება კონვენციის მე-2 მუხლის მატერიალურ ასპექტებთან დაკავშირებულ აქტებს გულისხმობს, დიდი პალატის თანახმად, მან შესაძლოა მოგვიყვანოს ცალკე არსებული და დამოუკიდებელი „ჩარევის“ დასკვნამდე. ამ თვალსაზრისით, ხსენებული პროცედურული ვალდებულება შეიძლება ჩაითვალოს, როგორც კონვენციის მე-2 მუხლიდან გამომდინარე განცალკევებადი ვალდებულება, რომელიც ეკისრება სახლმწიფოს მაშინაც კი, როდესაც მატერიალურ ასპექტებს შესაბამის თარიღამდე ჰქონდა ადგილი (*ibid*, §159).

40. პრეცედენტული სამართლისა და წინამდებარე საქმის გარემოებების გათვალისწინებით, სასამართლო მიიჩნევს, რომ მოცემულ შემთხვევაში, მას აქვს 1999წ. 20 მაისის შემდგომი პროცედურული ხასიათის აქტების/ხარვეზების განხილვის *ratione temporis* კომპეტენცია.

41. შედეგად, მთავრობის არგუმენტი უარყოფილ უნდა იქნას.

2. მიმართვის შიდასამართლებრივი საშუალებების ამოწურვასთან დაკავშირებით

42. მიუხედავად იმისა, რომ მთავრობა, როგორც ასეთი, არ აყენებს მიმართვის შიდასამართლებრივი საშუალებების ამოწურვასთან დაკავშირებულ არგუმენტს, სასამართლოს აზრით, სასურველია, წინამდებარე გადაწყვეტილების 53-ე პარაგრაფში მოყვანილი მთავრობის არგუმენტების ამ კუთხით განხილვა.

43. აღნიშნული არგუმენტების საპასუხოდ, მომჩივანი ამტკიცებს, რომ სისხლის სამართლის საქმის აღძვრაზე უარის თქმის შესახებ 2002წ. 10 ივნისის დადგენილება მისთვის საერთოდ არ გაუგზავნიათ და რომ მთავრობას უნდა წარმოედგინა მტკიცებულება გაგზავნის შესახებ, რათა დაესაბუთებინა მისი მტკიცებების სიმართლესთან შესაბამისობა. მომჩივანი სასამართლოს ყურადღებას ასევე მიაპყრობს იმ ფაქტზე, რომ საჩივრის მთავრობისთვის კომუნიცირებამდე, ის გამუდმებით აპროტესტებდა მის სხვადასხვა საჩივრებზე კომპეტენტური ორგანოების მხრიდან პასუხის არარსებობას. მომჩივანის თქმით, პირველად მთავრობამ მას სისხლის სამართლის საქმის აღძვრაზე უარის თქმის შესახებ 2002წ. 10 ივნისის დადგენილება მხოლოდ ევროპული სასამართლოს მიერ მისი პრეტენზიების კომუნიცირების შემდეგ, კერძოდ, 2006 წლის დეკემბერში გაუგზავნა. ამ დროისთვის უკვე შეუძლებელი იყო აღნიშნული დადგენილების გასაჩივრების მიზნით ეროვნულ

კანონმდებლობაში არსებული მიმართვის შიდასამართლებრივი საშუალებების გამოყენება.

44. სასამართლო აღნიშნავს, რომ მის შენიშვნაზე დაყრდნობით, რომლის მიხედვითაც, მომჩივანმა კანონიერ ვადებში არ განახორციელა ზემდგომი ორგანოებისთვის ან სასამართლოებისთვის მიმართვა 2002წ. 10 ივნისის დადგენილების გასაჩივრების მიზნით (სსსკ-ის 269-ე მუხლი), მთავრობას არ წარმოუდგენია არავითარი მტკიცებულება, რომელიც დაადასტურებდა, რომ აღნიშნული დადგენილება მომჩივანს დროულად გაეგზავნა, სსსკ-ის 268-ე მუხლის მე-2 პარაგრაფის შესაბამისად. (შეად., *mutatis mutandis, avec Moumladze c. Géorgie*, n° 30097/03, §§ 45-50, 8 janvier 2008). ამასთანავე, უნდა აღინიშნოს, რომ ევროპული სასამართლოსთვის მიმართვის მომენტში, 2005წ. 7 აპრილს, მომჩივანი კონკრეტულად ასაჩივრებდა იმ ფაქტს, რომ მას გამოძიების დაწყების მოთხოვნაზე *მარტვილის* პროკურატურიდან პასუხი არ მიუღია (იხ. §§ 2 და 33 ზემოთ). წინამდებარე საქმის გარემოებების გათვალისწინებით, სასამართლოს არავითარი მიზეზი არა აქვს, ეჭვი შეიტანოს აღნიშნული ინფორმაციის სისწორეში. გარდა ამისა, საქმიდან არ ირკვევა, რომ გამოძიების მიმდინარეობისას, მომჩივანს არასაკმარისი გულმოდგინება ან პასიურობა გამოეჩინოს (იხ. მაგალითად, §§ 24 და 25 ზემოთ). სამაგიეროდ, ირკვევა, რომ თავდასხმის საქმესთან დაკავშირებით, *მარტვილის* პროკურატურის მხრიდან რეგულაროულად ჰქონდა ადგილი მომჩივანთან კომუნიკაციის ნაკლებობასა და არარსებობასაც კი. ამგვარად, სისხლის სამართლის საქმის აღძვრაზე უარის თქმის შესახებ 2002წ. 25 მარტის დადგენილება გენერალური პროკურატურის მიერ გადასინჯულ იქნა არა მომჩივნის მითხოვნით, რომლისთვისაც აღნიშნულის შესახებ კანონით გათვალისწინებულ ვადებში არ შეუტყობინებიათ (იხ. §29 ზემოთ), არამედ, მომჩივანი ქალბატონის წერილის ერთ-ერთ გაზეთში გამოქვეყნების შემდეგ (იხ. §§ 22, 23 და 27 ზემოთ). საქმის მასალებიდან ასევე ირკვევა, რომ 2004წ. 10 მარტს, მომჩივანს არ ეცნობა 2002წ. 10 ივნისის სისხლის სამართლის საქმის აღძვრაზე ხელახალი უარის შესახებ (იხ. §29 ზემოთ). ასეთ პირობებში, სასამართლო სარწმუნოდ მიიჩნევს მომჩივნის მტკიცებას, რომლის თანახმად, მან 2002წ. 10 ივნისის სადავო დადგენილება მხოლოდ 2006 წლის დეკემბერში, ანუ წინამდებარე საჩივრის მთავრობისთვის კომუნიცირების შემდეგ, მიიღო. ნებისმიერ შემთხვევაში, ამ უკანასკნელს სასამართლოსთვის არავითარი საწინააღმდეგო მტკიცებულება არ წარმოუდგენია. 2006 წლის დეკემბერში დადგენილების გაგზავნამ მომჩივანს არ მისცა მთავრობის მიერ დასახელებული, სსსკ-ის 206-ე მუხლით გათვალისწინებული მიმართვის უფლების გამოყენების შესაძლებლობა, ვინაიდან ეს უკანასკნელი გაუქმდა 2005წ. 25 მარტის ცვლილებებით (იხ. §32 ზემოთ).

45. ზემოაღნიშნულის გათვალისწინებით, სასამართლო არ თვლის, რომ საჩივრის აღნიშნული ნაწილი აწყდება მიმართვის შიდასამართლებრივი საშუალებების ამოწურვის პრობლემას.

4. დასკვნა

46. ზემოაღნიშნული მოსაზრებებისა და იმის გათვალისწინებით, რომ მომჩივნის მიერ კონვენციის მე-2 მუხლის საფუძველზე წამოყენებული პრეტენზია არ არის მიუღებელი სხვა მიზეზთა გამო, ის მისაღებად უნდა გამოცხადდეს.

ბ. არსებითი მხარე

ა) მხარეთა არგუმენტები

47. მთავრობა მიიჩნევს, რომ კომპეტენტურმა ორგანოებმა შეტყობინება მომჩივნის სიცოცხლის ხელყოფის ფაქტთან დაკავშირებით მიიღეს მხოლოდ 2001 და არა 1997 წელს (იხ. §15 ზემოთ).

48. გარდა ამისა, მთავრობა ხაზგასმით აღნიშნავს, რომ 2001წ. 17 მაისსა და 2002წ. 27 მაისს, შესაბამისად, მომჩივნის მეუღლემ და ადვოკატმა მოითხოვეს ა.გ.ს ექვმიტანილად ცნობა. თუმცა, აღნიშნულ საკითხთან დაკავშირებით, გამოძიებას უკვე დადგენილი ჰქონდა, რომ არ არსებობდა აღნიშნული პირის ექვმიტანილად ცნობის საფუძველი (§§ 15 და 25 ზემოთ).

49. უფრო კონკრეტულად, მთავრობის აზრით, მომჩივნის სიცოცხლის ხელყოფასთან დაკავშირებული გამოძიების მიმდინარეობის დროს, დაკითხულ იქნენ გ.მ. და ვ.ბ. - *მარტილის* ყოფილი პროკურორი და მისი თანაშემწე. მათ დაადასტურეს მომჩივნის სახლში, 1998წ. 24 სექტემბერს გამართულ შეხვედრაზე დასწრების ფაქტი, ასევე დ.პ.-სა და გ.ტ.-ს მტკიცება, რომლის თანახმად, ა.გ. იყო დამაშაულის დამკვეთი. კომპეტენტურმა გენერალურმა ინსპექციამ განიხილა პროკურორ გ.მ.-ს უმოქმედობის გასაჩივრებული ფაქტი და არ დაადგინა მის უმოქმედობაში ბოროტმოქმედთა მფარველობის ფაქტის არსებობა. გარდა ამისა, დაუდგენელ დროს და დაუდგენელ მიზეზთა გამო, რომლებსაც მთავრობა არ აზუსტებს, აღნიშნული პიროვნება გათავისუფლებულ იქნა თანამდებობიდან პროკურატურის ორგანოების მიერ.

50. მთავრობა ამტკიცებს, რომ კო-იას მიერ მომჩივნის სიცოცხლის ხელყოფის ფაქტზე მიმდინარე გამოძიების ფარგლებში ჩვენების მიცემაზე უარის თქმის გამო (იხ. §19 ზემოთ), საგამოძიებო ორგანოებმა, მომჩივნის წინააღმდეგ აღძრული სისხლის სამართლის საქმის ფარგლებში, აღნიშნული პირის დაკითხვის ოქმის მოპოვების მიზნით, ქუთაისის საქალაქო სასამართლოს მიმართეს. და ეს იმის დადგენის მიზნით, რომ კო-იას თქმით, ა.გ.-ს არავითარი კავშირი არ ჰქონდა მომჩივანზე განხორციელებულ თავდასხმასთან. კო-იას აღნიშნული ჩვენების გათვალისწინებით, რომელსაც, სსსკ-ის 113-ე მუხლის მე-2 პარაგრაფის მიხედვით, მტკიცებულების ძალა აქვს, მომჩივნისა და მისი მეუღლის პრალდებები, მთავრობის

მტკიცებით, „საეჭვო და სრულიად არაგონივრულია“, მით უფრო, რომ ა.გ.-მ აღნიშნულ დანაშაულთან ყოველგვარი კავშირის არსებობა უარყო. რაც შეეხება 1998წ. 24 სექტემბრის შეხვედრის ვიდეოჩანაწერს, მთავრობა ხაზგასმით აღნიშნავს, რომ დ.პ.-სა და გ.ტ.-ს ჩვენებები მომჩივანმა იძულების გზით მოიპოვა, რაც, სხვათა შორის, კო-იამ ზემოაღნიშნულ ჩვენებაშიც დაადასტურა.

51. მთავრობა მომჩივანს ედავება, რომ მან უარი განაცხადა საგამომიებო ორგანოებთან თანამშრომლობასა და საქმეში ჭეშმარიტების დადგენისთვის ხელშეწყობაზე, ისე, რომ არ განუმარტავს აღნიშნულის მიზეზი და არც აცილება მოუთხოვია. მთავრობა არ თვლის, რომ მომჩივნის თვალში, არსებობდა *მარტვილის* პროკურატურისთვის აცილების მიცემის საფუძველი, იმ თვალსაზრისით, რომ 2001წ. 17 მაისსა და 2002წ. 27 მაისს, მისმა მეუღლემ სწორედ აღნიშნულ უწყებაში შეიტანა სხვადასხვა საჩივრები (იხ. §§ 15 და 24 ზემოთ).

52. დასკვნის სახით, მთავრობა მიიჩნევს, რომ სისხლის სამართლის საქმის აღძვრაზე უარის თქმის შესახებ 2002წ. 10 ივნისის დადგენილებას წინ უძღოდა კონვენციის მე-2 მუხლის მოთხოვნების შესაბამისი გამოძიება.

53. ნებისმიერ შემთხვევაში, აღნიშნული დადგენილება, რომელიც მომჩივანს დროულად გაეგზავნა, ზემდგომ ინსტანციაში ან სასამართლოში კანონით დადგენილ ვადებში არ გასაჩივრებულა (სსსკ-ის 268-ე მუხლის მე-2 ნაწილი და 269-ე მუხლი). იგივე დადგენილება მომჩივანს მეორედ გაეგზავნა 2006 წლის დეკემბერში და ამ უკანასკნელს მასთან დაკავშირებით არავითარი საჩივარი არ შეუტანია.

54. მომჩივანი ეწინააღმდეგება მთავრობის არგუმენტს და შეახსენებს, რომ იმისათვის, რომ გამოძიება იყოს ეფექტიანი, მისი ჩატარება უნდა დაევალოს რეალურად დამოუკიდებელ ორგანოს. აღნიშნული პრინციპის საწინააღმდეგოდ, მისი სიცოცხლის ხელყოფის საქმეზე გამოძიება ჩატარა *მარტვილის* პროკურატურამ, რომელსაც არც დამნაშავეები დაუსჯია და არც მათი მფარველი სახელწიფო მოხელეები.

55. მომჩივანი აღნიშნავს, რომ მთავრობა არ უარყოფს მის სახლში, 1998წ. 24 სექტემბერს გამართულ შეხვედრაზე გ.მ.-სა და ვ.ბ.-ს - მარტვილის ყოფილი პროკურორისა და მისი თანაშემწის დასწრების ფაქტს, რაც აღნიშნული ვიზიტის ვიდეოჩანაწერითაც დადასტურდა. მომჩივნის თქმით, მას შემდეგ, რაც აღნიშნულმა პირებმა დამნაშავეთა აღიარება მოისმინეს, მათ რეაგირება უნდა მოეხდინათ, დაეკითხათ ისინი, მოეხდინათ მათი დაკავება და მათ წინააღმდეგ სისხლის სამართლის საქმე აღედრათ, რათა ჩატარებულიყო ეფექტიანი გამოძიება. აღნიშნული ოფიციალური პროცედურის ფარგლებში, დაკავებული პირები დაადასტურებდნენ ან უარყოფდნენ მიცემულ ჩვენებებს და აქედან გამომდინარე, შესაბამისი ორგანოები გადაამოწმებდნენ, მოპოვებულ იქნა თუ არა აღნიშნული ჩვენებები მომჩივნის მიერ ზეწოლის გზით, როგორც ამას მთავრობა კო-იას ჩვენებაზე დაყრდნობით აცხადებდა. ამგვარად, მომჩივნის აზრით, ბოროტმოქმედებისა და მის ქმედებებს სამართლებრივი და სათანადო კვალიფიკაცია მიეცემოდა.

ბ) სასამართლოს შეფასება

56. უპირველეს ყოვლისა, სასამართლო შეახსენებს, რომ კონვენციის მე-2 მუხლი, რომელიც უზრუნველყოფს სიცოცხლის უფლებას, კონვენციის უმნიშვნელოვანეს მუხლებს შორის ფიგურირებს და დემოკრატიული საზოგადოების ფუნდამენტური ღირებულებების განუყოფელ ნაწილს წარმოადგენს, რომლებზეც დაფუძნებულია ევროპის საბჭო. სასამართლომ უკიდურესი ყურადღებით უნდა განიხილოს პრეტენზიები აღნიშნული დებულების დარღვევის შესახებ (*Natchova et autres c. Bulgarie* [GC], nos 43577/98 et 43579/98, § 93, CEDH 2005-VII).

57. სასამართლო იმეორებს, რომ კონვენციის მე-2 მუხლის I-ლი პარაგრაფის პირველი წინადადება სახელმწიფოს ავალდებულებს, არა მხოლოდ თავი შეიკავოს სიკვდილის განზრახ და უკანონოდ გამოწვევისგან, არამედ, ასევე, მიიღოს ყველა აუცილებელი ზომა მის იურისდიქციას დაქვემდებარებულ პირთა სიცოცხლის დასაცავად. აღნიშნული მოიცავს სახელმწიფოს უმთავრეს ვალდებულებას, უზრუნველყოს სიცოცხლის უფლება კონკრეტული სისხლის სამართლის კანონმდებლობის შექმნით, რომელსაც ექნება პირის წინააღმდეგ მიმართული ხელყოფის შემაკავებელი ძალა და დაეყრდნობა დარღვევათა პრევენციის, აღკვეთისა და დასჯის მექანიზმს (*Karagiannopoulos c. Grèce*, n° 27850/03, §53, 21 juin 2007). ზოგიერთ კონკრეტულ შემთხვევაში, აღნიშნული დებულება ასევე მოიცავს სახელმწიფოთა პოზიტიურ ვალდებულებას, პრევენციულად მიიღონ პრაქტიკული ხასიათის ზომები იმ პირთა დასაცავად, რომელთა სიცოცხლეს საფრთხეშია (*Scavuzzo-Hager et autres c. Suisse*, n° 41773/98, §51, 7 février 2006).

58. გარდა ამისა, სასამართლო შეახსენებს, რომ კონვენციის მე-2 მუხლიდან გამომდინარე სიცოცხლის უფლების დაცვის ვალდებულება, კონვენციის 1-ლი მუხლით გათვალისწინებულ სახელმწიფოთა ზოგად ვალდებულებასთან კომბინაციაში, “თავიანთი იურისდიქციის ფარგლებში ყველასათვის უზრუნველყონ ამ (...) კონვენციით განსაზღვრული უფლებები და თავისუფლებები,” გულისხმობს და მოითხოვს ოფიციალური ეფექტიანი გამოძიების რაიმე ფორმით ჩატარებას, როდესაც ძალის გამოყენებამ გამოიწვია ადამიანის სიკვდილი, მიუხედავად იმისა, აღნიშნულის ჩამდენი სახელმწიფოს წარმომადგენელია თუ მესამე პირი (*Tahsin Acar c. Turquie* [GC], n° 26307/95, §220, CEDH 2004-III). აღნიშნული მოსაზრება ეხება წინამდებარე საქმესაც, რომელშიც სასამართლომ დაადგინა, რომ მომჩივნის მიმართ განხორციელებულმა მოპყრობამ ამ უკანასკნელის სიცოცხლეს საფრთხეში ჩააგდო (იხ. §§ 34 და 35 ზემოთ). კერძოდ, საგამოძიებო მოქმედებები უნდა იყოს სიღრმისეული, მიუკერძოებელი და ყურადღებიანი (*McCann et autres c. Royaume-Uni*, 27 septembre 1995, §§ 161-163, série A n° 324).

59. გამოძიების ფორმა, რომელიც აღნიშნული მიზნების მიღწევას უზრუნველყოფს, შესაძლოა, გარემოებების შესაბამისად, სხვადასხვაგვარი იყოს. მიუხედავად ამისა, როგორც არ უნდა იყოს გამოყენებული ფორმა, შესაბამისმა ორგანოებმა, ინფორმაციის მიღებისთანავე, დანიშნულებისამებრ უნდა იმოქმედონ, და მათ პირის ოჯახის წევრს არ უნდა გადააბარონ საჩივრის ფორმალურად შეტანის

ინიციატივა ან აუცილებელი საგამოძიებო მოქმედებების ჩატარების პასუხისმგებლობის აღების შესაძლებლობა (*Tahsin Acar*, arrêt précité, §221 ; *Finucane c. Royaume-Uni*, n° 29178/95, §67, CEDH 2003-VIII).

60. გარდა იმისა, რომ ჩატარებული გამოძიება უნდა იყოს დამოუკიდებელი და მსხვერპლის ოჯახისთვის ხელმისაწვდომი, ის ასევე უნდა იყოს ეფექტიანი იმ თვალსაზრისით, რომ უნდა ჩატარდეს გონივრული ტემპითა და გულმოდგინებით, რომ მან საზოგადოებას უნდა მისცეს მასზე თვალყურის დევნების საკმარისი უფლება და შესაბამის შემთხვევაში, დასრულდეს პასუხისმგებელ პირთა იდენტიფიკაციითა და დასჯით (*Varnava et autres c. Turquie* [GC], n° 16064/90, 16065/90, 16066/90, 16068/90, 16069/90, 16070/90, 16071/90, 16072/90 et 16073/90, §191, CEDH 2009-... ; *Oğur c. Turquie* [GC], n° 21594/93, §88, CEDH 1999-III). ამ შემთხვევაში, საქმე ეხება არა შედეგთან, არამედ საშუალებებთან დაკავშირებულ ვალდებულებას. ხელისუფლების ორგანოებმა უნდა მიიღონ ზომები, რომლებიც მათთვის გონივრულობის ფარგლებში იყო ხელმისაწვდომი ინცინდენტთან დაკავშირებული მტკიცებულებების შეგროვების მიზნით (*Tanrikulu c. Turquie* [GC], n° 23763/94, §109, CEDH 1999-IV). ნებისმიერი ხარვეზი, რომელმაც შესაძლოა, ხელი შეუშალოს გამოძიებას პასუხისმგებელი პირის ან პირების გამოვლენაში, შესაძლოა იქცეს, მთლიანობაში, გამოძიების არაეფექტიანობის გამომწვევ მიზეზად (*Aktaş c. Turquie*, n° 24351/94, §300, CEDH 2003-V).

61. სასამართლო იძულებულია, აღიაროს, რომ შესაძლოა, არსებობდეს სირთულეები ან დაბრკოლებები, რომლებიც, განსაკუთრებულ სიტუაციაში, ხელს უშლის გამოძიების წინსვლას. თუმცა, ხელისუფლების ორგანოების სწრაფი პასუხი, როდესაც საქმე ეხება გამოძიების ჩატარებას სასიკვდილო ძალის გამოყენებასთან დაკავშირებით, შესაძლოა, იყოს საზოგადოების ნდობის შენარჩუნების უმთავრესი ფაქტორი, თანასწორობის პრინციპის პატივისცემის დაცვითა და უკანონო აქტებში მონაწილეობის, მათი შეწყნარების ან შეთანხმებით მათ ჩადენაში შთაბეჭდილების თავიდან აცილების მიზნით (*McKerr c. Royaume-Uni*, n° 28883/95, §§ 111 et 114, CEDH 2001-III ; *Brecknell c. Royaume-Uni*, n° 32457/04, § 65, 27 novembre 2007).

62. მოცემულ შემთხვევაში, სასამართლო იძულებულია, დაასკვნას, რომ სიცოცხლის ხელყოფის ფაქტი, რომლის ობიექტიც მომჩივანი გახდა, საკმარისად იქნა მიტანილი პროკურატურამდე, კომპეტენტურ უწყებამდე, რომელიც სსსკ-ის 24-ე მუხლის მე-2 და მე-4 ნაწილების, 261-ე მუხლის 1-ლი და 265-ე მუხლის 1-ლი და მე-4 ნაწილების საფუძველზე, ვალდებული იყო, ყოველ შემთხვევაში, 2005წ. 25 მარტამდე, დაუყოვნებლივ მოეხდინა ინფორმაციის გადამოწმება და შესაბამის შემთხვევაში, აღედრა სისხლის სამართლის საქმე ჭეშმარიტების დადგენის მიზნით. მიუხედავად იმისა, რომ აღნიშნული დებულება გარკვეულწილად შეიცვალა 2005წ. 25 მარტის საკანონმდებლო ცვლილებით, პროკურატურას მაინც ეკისრება სისხლის სამართლის საქმის აღძვრის ვალდებულება, როდესაც მას ეცნობება დანაშაულებრივი ფაქტების შესახებ, ისევე როგორც გამოძიების ჩატარების ვალდებულება პასუხისმგებელ პირთა გამოვლენის მიზნით (იხ. §32 ზემოთ).

63. იმ შემთხვევაშიც კი თუ კომპეტენტურ ორგანოებს 1997 წლიდანვე არ ეცნობათ აღნიშნულის შესახებ, როგორც ამას მომჩივანი ამტკიცებს (იხ. §§ 7, 15 და 47 ზემოთ), სასამართლო აღნიშნავს, რომ აღნიშნული ორგანოები მომჩივანზე განხორციელებული თავდასხმის ფაქტის წინაშე ორ პროკურორსა და სავარაუდო დამნაშავეებს შორის, 1998წ. 24 სექტემბერს შემდგარი შეხვედრისთანავე დადგნენ. აღნიშნული ფაქტის გათვალისწინებით, სასამართლო 1999წ. 20 მაისს, საქართველოსთან მიმართებაში კონვენციის ძალაში შესვლის შემდეგ მომხდარ აქტებს და/ან პროცედურულ ხარვეზებს განიხილავს ზემოთ, 38-40 პარაგრაფებში მითითებულ მიზეზთა გამო.

64. ამგვარად, სასამართლო აღნიშნავს, რომ მართალია, პროკურორები 1999წ. 20 მაისამდე რამდენიმე თვით ადრე, პირისპირ შეხვდნენ სავარაუდო დამნაშავეებს, მაგრამ მათ კვლავაც არ მოუხდენიათ რეაგირება, მიუხედავად იმისა, რომ მათ ევალუბოდათ, მომჩივნის მიერ წერილობითი საჩივრის ოფიციალურად შეტანის ლოდინის გარეშე, მოეხდინათ ამ უკანასკნელის დაჟინებულ მოთხოვნებზე რეაგირება, რათა დაეკავებინათ სავარაუდო დამნაშავეები, რომლებიც ამ უკანასკნელმა თვითონ მოძებნა, მისივე თქმით, სამართალდამცავ ორგანოთა უმოქმედობის აღმოფხვრის მიზნით. მომჩივანზე თავდასხმა განხორციელდა რა დასავლეთ საქართველოს ერთ-ერთ პატარა რაიონში, საქმის მასალებიდან და განსაკუთრებით, საქმის სხვადასხვა მონაწილეთა 1998წ. 24 სექტემბრის შეხვედრის ვიდეოჩანაწერიდან ირკვევა, რომ მომჩივანი, სავარაუდო დამნაშავეები, დანაშაულის სავარაუდო დამკვეთი, რაიონის პროკურორი და მისი თანაშემწე ერთმანეთს კარგად იცნობენ. სავარაუდოდ, სწორედ დისტანციის აღნიშნული ნაკლებობის, ან სასამართლოსთვის უცნობი სხვა მიზეზის გამო, პროკურორებმა, რომლებიც ადგილობრივ მოსახლეობასთან ყოველდღიური ცხოვრებით იყვნენ დაკავშირებულნი, თავს უფლება მისცეს, საკუთარი ფუნქციების განხორციელებისას, არჩევანი მომჩივნის კანონიერი მოთხოვნების იგნორირების სასარგებლოდ გაეკეთებინათ. სასამართლო კატეგორიულად გმობს იმ ფაქტს, რომ აღნიშნული უწყებების მიერ მათი უმთავრესი ფუნქციების შეუსრულებლობა წინამდებარე საქმეში კერძო პირთა შორის ანგარიშსწორების საფუძველი გახდა, რომელიც, თვით მომჩივნის თქმით, მხოლოდ 2000წ. 12 იანვარს, მისმა დაკავებამ დაასრულა (იხ. §11 ზემოთ).

65. შემდეგ, სასამართლო აღნიშნავს, რომ 2000წ. 7 აპრილს, კო-იას დაკითხვის დროს (იხ. §13 ზემოთ), პროკურატურის ორგანოებს ხელახლა ეცნობათ მომჩივნის სიცოცხლის ხელყოფის შესახებ, ისე, რომ ამას მათი მხრიდან არავითარი რეაგირება არ მოჰყოლია. ამის მიუხედავად, კო-იას მიერ აღნიშნულ დღეს მიცემული ჩვენებები საკმარისი რაოდენობის ელემენტებს შეიცავდა იმისათვის, რომ პროკურატურას ინფორმაცია გადაემოწმებინა, კერძოდ, მოეხდინა აღნიშნული პირისა და მომჩივნის დაპირისპირების ორგანიზება და ეცადა კონტაქტის დამყარება იმ პირთან, რომელსაც უნდა სცოდნოდა დ.პ.-ს სავარაუდო ადგილსამყოფელის შესახებ.

66. რაც შეეხება მომჩივანი ქალბატონის მიერ, დაკავებული მეუღლის სახელით, 2001წ. 22 მაისის ოფიციალურ საჩივარსა და შემდგომ საჩივრებს,

რომლებიც მომჩივანმა კომპეტენტურ ადგილობრივ და ეროვნულ ორგანოებში შეიტანა, სასამართლო აღნიშნავს, რომ მთავრობის არგუმენტის საპირისპიროდ, ა.გ.-ს სისხლის სამართლის პასუხისგებაში მიცემის გარდა, მომჩივანი გარკვევით ითხოვდა მისი სიცოცხლის ხელყოფისა და პროკურატურის დანაშაულებრივი უმოქმედობის ფაქტებზე გამოძიების ჩატარებას (იხ. §§ 15 *in fine*, 24, 25 და 29 ზემოთ). ნებისმიერ შემთხვევაში, ოფიციალური საჩივრის არარსებობის პირობებშიც კი, კომპეტენტური ორგანოები ვალდებული იყვნენ, გამოძიება მომჩივნის სიცოცხლის ხელყოფის ფაქტზე ინფორმაციის მიღებისთანავე ჩაეტარებინათ (ზემოხსენებული საქმეების გარდა, ბევრ სხვას შორის იხ. *Kelly et autres c. Royaume-Uni*, n° 30054/96, §94, 4 mai 2001).

67. რაც შეეხება *მარტვილის* პროკურატურის მიერ, 2001-2002 წლებში ჩატარებული გამოძიების ეფექტიანობას, საქმის მასალებიდან არ ირკვევა, ჩატარდა თუ არა საგამოძიებო მოქმედებები 2001წ. 22 მაისს, საჩივრის შეტანიდან - 2001წ. 30 ივლისამდე, სისხლის სამართლის საქმის აღძვრაზე პირველად უარის თქმამდე პერიოდში. მომჩივნის მტკიცების გარდა, რომლის თანახმად, *მარტვილის* პროკურატურამ სრული უმოქმედობა გამოიჩინა, აღნიშნულ საკითხზე საქმეში სხვა ინფორმაცია არ არსებობს. სისხლის სამართლის საქმის აღძვრაზე უარის თქმის შესახებ აღნიშნული დადგენილების გაუქმების შემდეგ, ადგილი ჰქონდა კო-იასა და მომჩივნის დაკითხვის მცდელობას. მაგრამ აღნიშნული პირების მოთხოვნაზე, ენახათ პროკურატურის სხვა სამსახურების მიერ გამოკვლეული საქმე, იმის გამო, რომ მათ *მარტვილის* პროკურატურის მიმართ ნდობა არ გააჩნდათ, არავითარი რეაგირება არ მომხდარა. მთავრობის მტკიცების საპირისპიროდ, აცილების მოთხოვნები მომჩივნისა და კო-იას მიერ მკაფიოდ იყო ფორმულირებული 2002წ. 7 მარტის დაკითხვების დროს (იხ. §§ 18 და 19 ზემოთ) და საქმის გარემოებების გათვალისწინებით, ისინი არ შეიძლებოდა, აშკარად დაუსაბუთებლად ყოფილიყო მიჩნეული. აღნიშნული მოთხოვნების განხილვის გარეშე, *მარტვილის* პროკურატურამ ორივე პირს სიმართლის დადგენის მიზნით არასაკმარისი თანამშრომლობა უსაყვედურა, რითაც დაასაბუთა 2002წ. 25 მარტის დადგენილება. მიუხედავად იმისა, რომ აღნიშნული დადგენილება შემდგომში გაუქმდა, არაფერი არ იძლევა იმის დასკვნის საფუძველს, რომ სისხლის სამართლის საქმის აღძვრაზე უკანასკნელად უარის თქმის შესახებ დადგენილების მიღებამდე დამატებითი გამოძიება ჩატარდა. მაგალითად, საქმიდან არ ირკვევა, რომ კო-იას აღიარება, რომელიც ეხება მომჩივნის მკვლელობის ორგანიზებას ა.გ.-ს წაქეზებით და რომლის შესახებ საგამოძიებო ორგანოებს 2001 წლის აპრილიდან ეცნობათ (იხ. §§ 14 და 29 ზემოთ), რაიმე სახის გადამოწმებას დაექვემდებარა, რომ რაიონის პროკურორისა და მისი თანაშემწის ჩვენებები, რომლებიც მომჩივნის მიერ წარმოდგენილ ფაქტებს ადასტურებს, სისხლისსამართლებრივი გამოძიების სხვა აქტების ჩატარების ობიექტი გახდა, რომ მოხდა მომჩივნის დაპირისპირება კო-იასთან ან კიდევ ა.გ.-სთან და რომ დ.პ.-ზე ძეგნა გამოცხადდა. რაც შეეხება პროკურატურის შიდა გამოძიების დასკვნებს, რომლებიც შემდგომში სისხლის სამართლის გამოძიების დროს იქნა გამოყენებული,

მთავრობას სასამართლოს წინაშე არც აღნიშნული დასკვნები წარმოუდგენია და არც სადავო ადმინისტრაციული გამოძიების სხვა მასალები (იხ. §§ 21, 23 და 49 ზემოთ).

68. და ბოლოს, სასამართლო აღნიშნავს, რომ რაიონის პროკურატურის დუმლის მიუხედავად, რომელსაც გენერალურმა პროკურატურამ რამდენჯერმე მოსთხოვა ანგარიშის ჩაბარება, ამ უკანასკნელმა არ მოახდინა ეფექტური რეაგირება (იხ. §30 ზემოთ). ამასთანავე, მომჩივნის მოთხოვნა, საქმე ჩამორთმეოდა *მარტვილის* პროკურატურას, რათა გამოძიება რეალურად დამოუკიდებელ უწყებას ჩაეტარებინა, უპასუხოდ დარჩა. მაშასადამე, გამომდინარე იქიდან, რომ აღნიშნულმა პროკურატურამ მანამდე უკვე გამოავლინა უუნარობა, ემოქმედა ადგილობრივი ცხოვრების სხვადასხვა მოქმედი პირებისგან სრულიად დამოუკიდებლად, რომ ა.გ. იყო ადგილობრივი პოლიციის ორი მაღალჩინოსნის მამა და რომ მომჩივანი, სხვებს შორის, მოითხოვდა, იმავე რაიონის პროკურორების სისხლის სამართლის პასუხისგებაში მიცემას, ის ფაქტი, რომ გენერალურმა პროკურატურამ საქმის გამოძიება *მარტვილის* პროკურატურას მიანდო, ცუდად შეთავსებადია იმ სახელმწიფო მოხელეების იერარქიული, ინსტიტუციური და პრაქტიკული დამოუკიდებლობის მოთხოვნასთან, რომლებსაც ევალებათ კონვენციის მე-2 მუხლიდან გამომდინარე გამოძიების ჩატარება (იხ. სხვათა შორის, *Ergi c. Turquie*, 28 juillet 1998, §§ 83-84, *Recueil des arrêts et décisions 1998-IV* ; *Scavuzzo-Hager et autres*, précité, §§ 78, 81 et 82).

69. ზემოაღნიშნული მოსაზრებების ერთობლიობის გათვალისწინებით, სასამართლო ასკვნის, რომ სახელმწიფომ არ შეასრულა მომჩივნის სიცოცხლის ხელყოფის საქმეში ეფექტიანი გამოძიების ჩატარების პოზიტიური ვალდებულება.

70. შესაბამისად, ადგილი აქვს კონვენციის მე-2 მუხლის პროცედურულ დარღვევას.

II. კონვენციის სხვა დებულებების სავარაუდო დარღვევა

71. კონვენციის მე-3 მუხლზე დაყრდნობით, მომჩივნები ჩივიან, რომ სადავო თავდასხმის დროს განხორციელებულ არასათანადო მოპყრობის ფაქტზე არავითარი გამოძიება არ ჩატარებულა. გარდა ამისა, ისინი ამტკიცებენ, რომ კომპეტენტური ორგანოების არაპირდაპირი უარი თავდამსხმელთა მიმართ სისხლისსამართლებრივი დევნის განხორციელებაზე, წარმოადგენს კონვენციის მე-6 მუხლის დარღვევას. კონვენციის მე-13 მუხლზე დაყრდნობით, მომჩივნები ასაჩივრებენ სასამართლოში პროკურატურის უმოქმედობის გასაჩივრების სამართლებრივი შესაძლებლობის არქონას, რომლიც მსხვერპლნიც ისინი გახდნენ.

72. კონვენციის მე-2 მუხლის დადგენილი დარღვევის გათვალისწინებით (იხ. §70 ზემოთ), სასამართლო მიიჩნევს, რომ მან განიხილა წინამდებარე საჩივარში წამოჭრილი უმთავრესი სამართლებრივი საკითხი. საქმის ფაქტების ერთობლიობის გათვალისწინებით, სასამართლო მიიჩნევს, რომ არ არსებობს კონვენციის მე-3, მე-6

და მე-13 მუხლების საფუძველზე წამოყენებული სხვა პრეტენზიების ცალკე განხილვის აუცილებლობა (*Kamil Uzun c. Turquie*, n° 37410/97, §64, 10 mai 2007).

III. კონვენციის 41-ე მუხლის გამოყენება

73. კონვენციის 41-ე მუხლის შესაბამისად,

„თუ სასამართლო დაადგენს, რომ დაირღვა კონვენცია და მისი ოქმები, ხოლო შესაბამისი მაღალი ხელშემკვრელი მხარის შიდასახელმწიფოებრივი სამართალი დარღვევის მხოლოდ ნაწილობრივი გამოსწორების შესაძლებლობას იძლევა, საჭიროების შემთხვევაში, სასამართლო დაზარალებულ მხარეს სამართლიან დაკმაყოფილებას მიაკუთვნებს.“

ა. ზიანი

74. მიუთითებს რა *ასანიძის* საქმეზე (*Assanidzé c. Géorgie* [GC], n° 71503/01, §§ 199-201, CEDH 2004-II), მომჩივანი მიიჩნევს, რომ მთლიანობაში განცდილი ზიანის სანაცვლოდ, სასამართლომ მას მინიმუმ 150.000 ევრო უნდა მიაკუთვნოს.

75. მთავრობა მოთხოვნილ თანხას დაუსაბუთებლად და გადაჭარბებულად მიიჩნევს.

76. თავის მხრივ, სასამართლოს ეჭვი არ შეაქვს იმაში, რომ რომ გამოძიების არასრულყოფილი ხასიათისა და ქართული სახელმწიფოს მხრიდან მისი ძირითადი ფუნქციების შეუსრულებლობის გამო (იხ. §§ 64-69 ზემოთ), მომჩივანმა უდავოდ განიცადა მორალური ზიანი. აქედან გამომდინარე, ხელმძღვანელობს რა სამართლიანობის პრინციპით, სასამართლო მომჩივანს მიაკუთვნებს 12.000 ევროს მორალური ზიანის ანაზღაურების სახით.

ა) ხარჯები და დანახარჯები

77. მომჩივანი, ყოველგვარი დამადასტურებელი დოკუმენტის წარმოდგენის გარეშე, მოითხოვს 1.000 ევროს გაწეული ხარჯებისა და დანახარჯების ანაზღაურების სახით. მთავრობა უარყოფს აღნიშნულ მოთხოვნას და მას დაუსაბუთებლად მიიჩნევს.

78. სასამართლო შეახსენებს, რომ რეგლამენტის მე-60 (§2) მუხლის შესაბამისად, კონვენციის 41-ე მუხლის საფუძველზე წამოყენებული თითოეული პრეტენზია უნდა იყოს დაანგარიშებული, შესაბამის გრაფებში განაწილებული და თანდართული აუცილებელი მტკიცებულებებით გამყარებული, რის გარეშეც, სასამართლოს შეუძლია, ნაწილობრივ ან მთლიანად უარყოს აღნიშნული მოთხოვნა (*Svipsta c. Lettonie*, n° 66820/01, § 170, CEDH 2006-...(ამონარიდები)).

79. აღნიშნული პრინციპების გამოყენებით, სასამართლო მიიჩნევს, რომ მოცემულ შემთხვევაში, არ არსებობს გაწეული ხარჯებისა და დანახარჯების ანაზღაურების სახით მომჩივნისთვის თანხის მიკუთვნების საფუძველი.

გ) საურავი

80. სასამართლოს საჭიროდ მიაჩნია, რომ საურავის ოდენობა დადგინდეს ევროპის ცენტრალური ბანკის ზღვრული სასესხო განაკვეთის მიხედვით, რასაც დაემატება სამი პროცენტი

ზემოხსენებულიდან გამომდინარე, სასამართლო ერთხმად :

1. მისაღებად აცხადებს მომჩივნის მიერ კონვენციის მე-2 მუხლის საფუძველზე წამოყენებულ პრეტენზიებს ;

2. ადგენს, რომ ადგილი ჰქონდა კონვენციის მე-2 მუხლის პროცედურულ დარღვევას მომჩივანთან მიმართებაში;

3. აცხადებს, რომ განცალკევებულად არ განიხილავს დანარჩენ პრეტენზიებს;

4. ადგენს, რომ

ა) მოპასუხე სახელმწიფომ, მომჩივანს, კონვენციის 44-ე (§2) მუხლის შესაბამისად, გადაწყვეტილების ძალაში შესვლის დღიდან სამი თვის განმავლობაში, გადახდის დღეს არსებული კურსით, ეროვნულ ვალუტაში, უნდა გადაუხადოს 12.000 (თორმეტი ათასი) ევრო მორალური ზიანისათვის, რომელსაც დაემატება ნებისმიერი საშემოსავლო გადასახადი, რომელიც შეიძლება გადასახდელი გახდეს;

ბ) აღნიშნული ვადის გასვლის შემდეგ, თანხის სრულ გადარიცხვამდე, ზემოხსენებულ თანხას საჯარიმო პერიოდის განმავლობაში დაერიცხება, გადახდის დღეს მოქმედი, ევროპის ცენტრალური ბანკის ზღვრული სასესხო განაკვეთის თანაბარი ჩვეულებრივი პროცენტები, რასაც დაემატება სამი პროცენტი ;

5. უარყოფს დანარჩენ მოთხოვნებს სამართლიან დაკმაყოფილებასთან დაკავშირებით.

შესრულებულია ფრანგულ ენაზე და მხარეებს ეცნობათ წერილობით 2010წ. 8 ივნისს, სასამართლოს რეგლამენტის 77-ე მუხლის (§§ 2 და 3) შესაბამისად.

სალი დოლე

ფრანსუაზ ტულკენსი

სექციის განმწესრიგებელი

თავმჯდომარე